

# Ekap Yudañâ kulengoip.

---

## Mâsop den.

<sup>1</sup>Nâ Yuda, Yesu Kristogât kore a, Yakobogât munñâ. Anutu Ibâñâ umñâ a ambân gâsâzângom diizingi Yesu Kristonâ galem otzingâmap, zengât ekap zi kulemguan. <sup>2</sup>Zengâren buku sot um lumbe sot tânagoagon muyagem zimbap.

## Sarâ a, zengât den.

<sup>3</sup>Bukurâpnâ, Nen ârândâñ sinji âlip umñan bagim ândien. Sinji âlip den zorat kulemgum zingâbatkât otnigi ândiwan. Ka zi girem den ñâi kulemgum zingân. Zen den sinji âlipñâ birâbegât opñâ ekap zi kulemgum zingân. Sinji âlip zo mem kâtigem ândim zâinatkât Anutugât sinji a sâm ningip. Zo gulip opapkât den zi kulemgumñâ zingân. <sup>4</sup>A nâmbutñâ zen osetziñan tik bagiwe. Mârumñan zengât topziñ itâ sâm kulemguwe, “A yatâ zo, zen tâmbetagoagonan bagibi.” A zo, zen um kâtik op Anutugât den sinji âlip zo târârak mân sâm kut ñâi ñâi bâliñ lañ op patâniñâ Yesu Kristo kwâimbâñangâme.

<sup>5</sup>Anutugât diñâ birâme, zen hâuñâ zingâmap. Zo âlip nâñge. Oi zorat sa nâñgânek. Kembu zâk Isirae a Aigita hânân gâbâ mâkâzingip. Oi zengâren gâbâ nâmbutñandâ zâkkât diñâ birâwe, zo ko tâmbetzângoip. <sup>6</sup>Oi sumbem a nâmbutñâ zen nep diñâ birâm mirâ kamânziñ birâwe. Yatâ utnetâ ko Anutu zâkñâ zen tâk kâtikñandâ saazingâm ñâtâtigân zâmbari narâk dâp zem zâimambi. Anutuñâ sâi zen narâk patin hâuñâ mimbigât mambât zie. <sup>7</sup>Oi Sodom sot Gomora sot kamân nâmbutñâ zem arip, zen yatigâk bâliñâ lañ opñâ kut ñâi ñâi mân orotñâ muyagine kârâp tâmbâñan zâmbari gei ândie. Nen zo ekñâ yatâ mân utnatkât oip.

## Kembugât den ku a, zengât den.

<sup>8</sup>Oi bâliñ mâme a osetziñan bagim ândie, zen umanân nâñgâm yatigâk kut ñâi ñâi bâliñâ zo upme. Oi sâkziñandâ bâliñâ muyagime. Oi zen a patâ mân hurat kwatziñgâm sumbem a âsakñâziñoot zo sâm bâliñ kwatziñgâme. <sup>9</sup>Bâliñ mâme a ziñ a imbañâziñoot lañ sâm bâliñ kwatziñgâme. Ka sumbem

a zengât patâ Mikai, zâkñâ yatâ mân oip. Zâk Mose kâmbârânjangât Satarj sot sârek âragumñâ Satarj den bâliñ dukubatkat nânji mân dâp oi itâ dukuip, “Kembunâ hâuñâ gibap.” <sup>10</sup>Ka bâliñ mâme a zi, zen kut ñâi ñâi topñâ mân nânjgâm lañ sâm bâliñ kwatziñgâme. Zen zuu yatâ nânjgânânjgâziñ buñ lañ op tâmbetagoime. <sup>11</sup>Yei, Zen gâtâm dap upi? Zen Kaingât mâtâp lâñme. Oi kât sikumgât opñâ Propete Bileamgât mâtâp bâliñâ lâñme. Oi Kora zâk zâizâinânjgât op tâmbetagoip, zen yatigâk zâizâinânjgât op tâmbetagoime.

<sup>12</sup>A nâmbutñâ zuu bâugât op siñgi âlip minduminduyân takâme. A zo, zen anunziñ buñandâ yatâ upme. Yesugât sii nalem ninam mindune a zo osetziñan tapñâ anjun buñ lañ nime. Zen ziiñangât nânjgâne zari upme. A zo, ziñ sasa yatâ. Pibânâ sasa mem âim gâi sâbâyân buñ opmap. Zen âup sasa barâ kwâkñan memap yatâ, bon buñ. A zo, zen nak keet kwânâkwânânjgân narâkñan keet buñ kinetâ kârâm sâmbum birâbirân yatâ. Topziñ zo yatâ. <sup>13</sup>A zo yatâ, zo saruñâ kom lum âim gâmap. Kut ñâi ñâi bâliñâ kom gâbârem lum âim gâmap yatâ. Zen sâñgelak gulip âim gâmap yatâ. A zo, zen ñâtâtigân âi ândim âimambigât siñgi sâip.

#### **Henokñâ den kubikkubik narâk, zorat den sâip.**

<sup>14</sup>Adamgât kiurâp âsagem gane nâmburân zagât oi Henok muyageip. Oi Henok zâk a yatâ zo zengât itâ sâip, “Iknek. Kembu zâk tirik arâpñâ doñbep patâ zen sot gâbâmap. A aksik zengât topziñ sâm muyagei um kâtik a bâliñânjgât topñâ sâm muyagem ziñgâbap. <sup>15</sup>Bâliñ mâme a zen den bâliñ top top sâm Anutu sâm bâliñ kwâkñangâwe, zorat hâuñâ ziñgâbap. <sup>16</sup>A yatâ zo, zen kut ñâi ñâi âsagei nânjgâne bâliñik oi Anutu sâm bâliñ kwâkñangâme. Âkñâlezziñangârâk kut ñâi ñâi nânjgâme, zorat mâtâp lâñme. Oi zen ziiñangât nânjgâne zâizâiñ oi kutziñâ lum zaatme. Oi ziñâ a nâmbutñâ zengâren kut ñâi ñâi minam kelâk pame.

#### **Girem den.**

<sup>17</sup>Buku âlip gakârâpnâ, zen Kembuniñ Yesu Kristogât Aposolo ziñâ den kândom sâwe, zo nânjgâm ândibi. <sup>18</sup>Zen itâ dâzânjom ândiwe, “Narâk pânkânok oi Anutugât den kukuñ a zo, ziñâ bâliñânjgât nep tuum ândim ziiñangât nânjgâne zâibap.” <sup>19</sup>A yatâ zo, ziñâ a kâsâpziñgobi. Zen hângât âkñâle zorat nânjgânânjgâ ândibi. Oi zen Tirik Kaapum buñ.

<sup>20</sup>Bukurâpnâ, zen ko Tirik Kaapumgâren gâbâ nânjgâm pâlâtânj bonñâ zorânj mam otziñgi kâtigem ândibi. Oi Tirik Kaapum wâratkum ninâu sâm ândibi. <sup>21</sup>Yatâ utne Anutuñâ umñandâ gâsâzânjgoi zâk sot pâlâtânj op ândibi. Oi Kembuniñâ Yesu Kristo lumbeñâ muyagei ândiândi kâtik muyagibigât mambât ândibi. <sup>22</sup>Oi a nâmbutñâ Kembangât den minâ birânâ mem ândime, zo tânzânjgone mem kâtigibi. <sup>23</sup>Oi a nâmbutñâ sim kârâbân geinam utne zengât umbâlâ op gâsum mâkâziñgâbi. Oi zengât bâliñâ zo zengâren âibapkât kengât op galem oranjâm ândibi.

**Den murukjâ.**

<sup>24-25</sup>Galem otziŋgi mân tâmbetagon ândine zâkkât âsakŋan zâmbari um salek op sâtâre op kinbigât imbaŋâ zemŋâŋgap, Anutu kânok sot Kembuniŋâ Yesu Kristo, zâk kubikkubikniŋâ ândiapŋâ âsakŋâ neule sot imbaŋâ mârumŋan gâbâ zem gâip sot zemŋâŋgap, oi zem zâibap. Zo perâkŋak.

Zo yatik.